

釣磯文集

後學陳祖蔭
題簽

唐徐正字昭夢公著

欽
礪
文
隹
隹
木

後學程搏遠



題簽

唐祕書省正字先輩徐公鈞磯文集序

朝請郎編修道史檢察官兼次崇文總目管江州太平
觀守祕書省著作佐郎賜紫魚袋族孫師仁撰

正字諱寅字昭夢按五代史閩世家稱正字唐時以進士名
依王審知仕宦九國志列傳正字莆田縣人乾寧初舉進士
禮部試止戈爲武賦一燭纔盡已就有破山加點擬戍無人
之句侍郎李憚覽而奇之是歲釋褐祕書省正字歸寧于閩
中屬江淮盜蠭起退居延壽溪王審知聞之辟居幕下而禮
待簡略內不能平一旦拂衣去曰丈尺之水前陂後堰安能
容芻餼之舟乎尋舊隱慨然有長往之志王延彬刺泉州每

同遊賞及陳郟倪曙等賦詩酣酒爲樂凡十餘年求還所居
嘗被病遣求藥物於延彬答書曰善自調護亦可自開豁三
皇五帝不死何歸蓋舉賦語以戲之竟卒于延壽之別墅本
朝張丞相記正字未第時道汴州進謁梁祖而賦無雲而雨
篇立就其斷句云爭表梁王造化功大蒙賞遇及解褐東還
祖爲開宴醉中誤觸諱歸館了悟憂在不測復製遊大梁賦
以獻其略曰客有得意還鄉遊于大梁遇郊垞之耆舊問今
古之侯王父老曰且說當今休論前古昔時之功業誰見今
日之聲名有觀中一聯云遂使千年漢將憑吉夢以神符一
眼胡奴望英風而膽喪祖曾夢晉信授以兵法胡奴指李克

用也祖讀至此大悅令軍士傳寫皆諷誦之敕字酬一縑不復責前事按崇文總目正字賦五卷探龍集一卷題曰僞唐徐某撰正字實未嘗仕僞唐也師仁家故有賦五卷探龍集五卷正字自序其後又於蔡君謨家得雅道機要一卷又訪於族人及好事者得五言詩并絕句合二百五十餘首以類相從爲八卷并藏焉正字人生幾何賦至今膾炙人口兒童婦女往往道徐先輩而集有贈渤海高元固詩序云高見訪於閩中言本國得斬蛇劍賦御溝水賦人生幾何賦家家皆以金書列爲屏障又自詠詩註云溫陵吏宅有圖障二而張林西樓書手作迴文八體詩每一首顛倒讀成八首以此知

正字之文不獨行於當時名於後世亦播於異域也然八體
迴文詩尋討未獲小說載仁綾餅燄絕句亦不見全其餘碑
碣之屬甚衆類皆亡失豈其賦特高故他文遂不俱傳歟今
觀牋疏頗類玉溪而律詩精練不減同時韓致光吳子華諸
人也惜乎遭罹亂世不獲少伸其志其來閩中且有前陂後
堰之歎安有爲朱溫所屈哉殆亦言遜避禍不得不爾也張
丞相記頗詳足以附見建炎三年三月序

唐祕書省正字先輩徐公鈞磯文集序

文集者入莆第四代祖先輩公所撰文也公諱寅字昭夢登唐乾寧進士第試止戈爲武賦魁天下授祕書省正字先輩時人推尊之稱也鈞磯乃歸隱適意處號也予嘗觀舊譜載十二代著作佐郎賜紫魚袋師仁公所著文集序云先輩公文字頗多家故有賦五卷探龍集五卷又於蔡君謨家得雅道機要一卷詩二百五十餘首蓋詳論之既有其序時必有集今皆亡失故常鬱鬱不樂凡對族人惟以不得其文爲憂嘆至延祐丁酉歲叔父司訓公于洛如金橋林必載家得詩二百六十餘首復於己亥歲族叔祖道眞公遺賦四十篇不

勝欣慰合而寶之後則屢求未能再得洎邇歲塵事稍息謹述世緒聲跡已詳于譜牒復讀威武軍殿中侍御史劉公山甫撰公墓誌銘謂公所著詞賦感動鬼神搜括造化又謂悲泣百靈包羅萬象明珠無價至道不文窮達理性諷誠澆浮合先聖賢之意矣讀之至是愈有所感今則據其所得詩賦暫編成卷裝潢類諸譜牒合與族人暨諸君子共之可以知吾祖先手澤尙存而流衍無窮抑祝厥後子孫勉而求之以增是卷庶不負吾家文獻之烜燿遂書之以爲後之識也

玩可珍謹識

唐祕書省正字先輩徐公鈞磯文集目次

序二

卷一 御溝水

人生幾何

毛遂請備行

鮫人室

卷二 朱虛侯唱田歌

東陵侯弔蕭何

管仲棄酒

澗底松

卷三 太極生兩儀

五王宅

卞莊子刺虎

割字刀子

斬蛇劍

首陽山懷古

玄宗御製盧徵君草堂銘陳後主獻詩

外舉不避讐

貴以賤爲本

扣寂寞以求其音

員半千說三陣

駕幸華清宮

鑄百練鏡

文王葬枯骨

再幸華清宮

玄宗御注孝經

句踐進西施

薦蘭相如使秦

避世金馬門

義漿得玉

知白守黑爲天下式

全

載

道

樓

卷四 止戈爲武

豐年爲上瑞

竹篋子

江令歸金陵

卷五 過驪山

隱居以求其志

星闕

伍員知姑蘇臺有遊鹿

補遺 均田

衡

考異

跋二

垂衣裳而天下治

福善則虛

口不言錢

樊噲入鴻門

山暝孤猿吟

雷乃發聲

衡

徐氏唐入莆譜序

軼事

傳記

附錄

入國知教

歌

朱雲請斬馬劍

漢武帝求仙

白衣入翰林

寒

籍田

附錄

附錄

附錄

附錄

唐秘書省正字先輩徐公鈞磯文集卷第一

閩 徐 寅 昭夢 著

賦

御溝水賦

以月苑花隄遙
濟東渭爲韻

陸海之中昆明以東御爲溝而有自溝注水以無窮縈紫閣
之千峯清辭玉洞瀉銀河之一派冷入瑰宮我西都聖地正
三秦天連五緯不知此水之出但見斯溝之貴既非減灞以
分滻又匪疏涇而鑿渭是何飛下雲霓沿高走低潺湲乎玄
豹岡北繚繞乎靈龜岸西豈因水伯穿地維通來玉輦必是
神龍爲天子吐灌金隄上繞蓬瀛中侔溟渤涵暮景於瓊殿

倒晴光於絳闕色入天池遠不遠兩岸垂楊聲喧金屋眠不
眠六宮明月迴瀉岩嶢高連碧霄朝宗而鳳沼將近習坎而
龍宮不遙漱今古之雄都千門水鏡截東西之大道幾處虹
橋豈不以決泄年長泉源地遠青蕪濯翠兮霄雨霽紅杏飄
英兮春日晚堪歌聖代浮通其德澤恩波莫問當時流破其
秦宮漢苑香徹天涯先來帝家重輪而瑞蘸紅日五色而光
搖彩霞時時而翡翠隨波飛穿禁柳往往而鴛鴦逐浪銜出
宮花其或赫日流金與人望歲咸憂地利以將失願假天波
而下濟分紫禁以餘潤作黔黎之大惠則禹濬川也不爲已
而爲人農擊壤焉不荷天而荷帝玉堂金殿兮知不知敢進

芻蕘於此際

斬蛇劍賦

以仗劍斬蛇金
銘水鐔爲韻

磨霜礪雪兮熒煌錯落伊逐鹿之英聖兮有斬蛇之鋒鏑蓋
以麾正乾坤劃分善惡楚國之姦雄徒爾烹若窮鱗常山之
首尾胡爲斷如朽索斯劍也上應君臨舒陽慘陰有其道則
威若身兮靈若心無其道則鉛其刃兮木其鐔惟上德之在
火協紅爐之躍金莫不龍活三尺霆飛半尋是何靈貺之異
天啓之始而乃振戎衣授秋水匣辭乎豐沛之邑腰入乎崑
函之里日月方暝雲雷未起有大蟒以橫路礙潛龍之舉趾
於是上較天意下量地紀視鈇鋒而何斯違斯擊怪物而宛

其死矣然後挫七雄削多壘豈惟仗之翦長蛇而戮封豕蓋
將提之令諸侯而禪天子得非秦毒之奢變作長蛇漢德之
儉化爲神劍奢以儉陷蛇以劍斬道在晦而須顯事有增而
必減果聞哭白帝之亡符赤帝之昌雖行大義亦假雄鉞莫
不龜文龍藻玉鏤金裝世亂將用時清則藏十二年兮加我
淬七十陣兮摧爾剛空山吞象之鱗豈鉋蓮鏑大澤銜珠之
血不汚星光然後歷興亡經得喪漢之滅兮魏之受魏之衰
兮晉之仗晉火起兮高飛豈混煙煤之狀

句踐進西施賦

以紅顏豔色返
以昏哉爲韻

惑人之心兮惟巧惟譖破人之國兮以妖以豔當句踐之密

謀進西施而果驗昔者二國相吞陵卑恃尊殊不知卑則自
亡而固存尊則爲明而反昏鳥喙年年誓啄夫嗟之肉稽山
日日拜聽范蠡之言言曰伍員之賢東吳之德伯嚭之佞東
吳之賊德之盛兮越可憂賊之興兮吳可殛臣以夙夜而計
機謀偶得欲狂敵國之君須中傾城之色待其聲色內伐君
臣外惑自然紂妲己以亡宗晉驪姬而亂國今苧蘿之山越
水之灣恐是神仙之化忽生桃李之顏波淺丹臉鴉深綠鬢
顰翠黛兮慘難效浣輕紗兮妖且閑楊柳弱羞芙蓉豔恥可
以變柳惠於貞莊之際悅荆王於魂夢之裏臣請進焉王今
何以王乃豁然而喜矍然而起曰此蓋神假卿之奇畫天雪

越之前恥乃命寶馬騰龍香車碾風迎織女於銀漢聘姁娥
於月宮炫耀雲外喧闐洞中妝成而瑞玉凝彩服麗而朝霞
翦紅昨宵猶賤今晨不同甯期大國之君流恩下及堪恨鄰
家之婦謂妾長窮曉別越溪暮歸吳苑越慮計失吳嫌進晚
歌一聲兮君魄醉笑百媚兮君心卷坐令佞口因珠翠以興
言立遣謀臣棄洪濤而不返句踐乃走電驅雷星馳箭催投
醪而士卒皆醉嘗膽而胸襟洞開虎噬骨碎山崩卵摧楚腰
衛鬢化爲鬼鳳閣龍樓燒作灰於是命屠蘇之酒上姑蘇之
臺伊霸業以何去俄英風而聿來嗚呼殺忠賢而受佳麗欲
弗敗其難哉

人生幾何賦

以歸心主樸福
履何容爲韻

葉落辭柯人生幾何六國戰而謾爲流血三山神而杳隔鯨
波任誇百斛之明珠豈延遐壽或有一卮之芳酒且共高歌
豈不以天地爲爐日星爲紀雖有聖而有智不無生而無死
生卽浮萍死爲流水七十戰爭如虎豹竟刎烏江三千賓客
若鴛鴻難尋珠履擾擾忽忽晨雞暮鐘命難保兮霜與露年
不禁兮椿與松問青天兮陰慘陽舒拘人否泰歎白日兮東
生西沒奪我顏容可惜繁華堪驚倚伏有寒暑兮促君壽有
鬼神兮妒君福不覺南陵公子綠鬢改而華髮生北里豪家
昨日歌而今日哭夢幻吞侵朝浮夕沉三光有影遣誰繫萬